

Masters di Aruba Dolphins a cosecha exito na Panams 2007

RECIENTEMENTE, durante prome weekend di september, a tuma lugar den Natatorio de San Juan na Puerto Rico, e complejo aquatico mas moderno di caribe, e di dos competencia Panamericano di Natacion Master. 13 landador master di Aruba Dolphins a bai competi na San Juan den representacion di Aruba.

Un competencia bon organisa cu un programa bon balansa y cu enfoke special tambe riba e hecho cu ta trata di landadornan adulto. E comision organisador bou di guia di sr. John Perez a haci hopi esfuerzo pa cosnan a cana como debe ser y pa haci estadia di landadornan uno placentero.

Por bisa cu masters di Aruba Dolphins a haci un tremendo papel terminando na di 4 lugar den 35 team cu tabata representa 12 pais. Puerto Rico mes a keda na prome lugar, Venezuela na di dos, Mexico na di tres y Aruba na un bunita di 4 lugar. Ademá Maicha Croes, Ena Schwengle y Eduardo de Veer a gana high point trophy den nan categoria di edad. Como team Masters di Aruba Dolphins a trese cas un total di 61 medaya. 15 di oro, 34 di plata y 12 di brons.

Mester haci mencion special di recordnan nobo cu masters di Aruba Dolphins a laga atras. Pa cuminsa riba 100 meter schoolslag Aceneida de Mey a pone un

record nobo kibrando su mes record bieu di dos aña pasa. Tambe Ena Schwengle a kibra su propio record riba 400 meter freestyle y ta pone record nobo riba 800 y 50 meter freestyle. Maicha Croes co-fundador di Dolphins, landador di trayectoria bon conosi a debuta den bon forma internacionalmente y banda di su high point trophy ta pone record riba su number tambe den 50 meter schoolslag. E team di medley relay mixed consistiendo di Aceneida de Mey, Ena Schwengle, Eduardo de Veer y Roly Bisslik tambe a laga un record nobo atras. Den varios otro evento recordnan di 2 aña pasa a keda riba number di landadornan di

Aruba Dolphins.

Como lider di delegacion a biaha hunto cu e landadornan sr. Nelson Yarzagaray cu mester a cumpli cu extra tarea ya cu un apelacion a wordo haci riba su persona pa durante henter e competencia pa fungi como FINA-oficial.

Aruba Dolphins por wak atras riba un competencia pa masters Panamericano sumamente exitoso. Speranza ta cu e team di masters lo sigui train cu mes animo pa e Campeonato Arubano pa masters y e 2 kilometer open water organisa pa Aruba Dolphins dentro di poco.

